

四庫全書

集部

欽定四庫全書

集部
曝書亭集卷
四至
六

詳校官庶吉士_臣汪彥博

助教_臣常循覆勘

總校官降調編修_臣倉聖脉

校對官檢討_臣盧遂

謄錄監生_臣呂永安

欽定四庫全書

曝書亭集卷四

翰林院檢討朱彝尊撰

古今詩

三

著雍閏茂

將歸留別粵中知己

請君膝上琴彈我游子吟
哀絃激危柱離思難為音
賓御皆煩紆何況居者心
于役既有年歸哉方自今
不辭

路悠長眷此朋盍簪山川一以隔邈若商與參行邁日
靡靡憂心亦欽欽汎舟滄浪天驅車過雲岑中誠何用
寫執手情靡任

峽山飛來寺

花宮蕭瑟暮雲間絕磴藤蘿迴莫攀一自高風留帝子
至今修竹滿空山澄潭犀去沈金鎖古洞猿歸帶玉環
此夕登艫渾不寐更教浴月弄潺湲

凌江道中

遠客千行淚離程一葉舟生憎江上水不肯向東流

楊歷巖觀瀑布水

瞻塗越修畛遵渚拂雲苔駕言陶嘉月采隱滌氛醺舍
車循曲汜捫葛升陵喬柔荑挺英蕊灌木蔚豐條仰沾
潺湲沫俯聆載道飈逝者如斯夫存至非崇朝靜觀羣
化遷始悟萬象超一鼓丘中琴清響流山椒鳴鳥聲相
求潛虬德彌飭願言繫白駒於焉永逍遙

雄州歌四首

雄州滿目瘴雲霾風物當年亦可懷
大庾梅花連小庾
正階流水入斜階

綠榕萬樹鷓鴣天水市山橋阿那邊
蠻雨蠻煙空日夜
南來車馬北來船

滇江西下墨江流來鴈孤亭春復秋
十部黎園歌吹盡
行人虛說小揚州

山頭風急雨淒淒篁竹荒茅一望迷
縱有歸人歸未得
空勞夜夜子規啼

席上留別陸兄

世楷

但秉中宵燭重為旅舍吟
驪駒即長道絲竹本哀音
越嶠停雲遠秦關落日陰
無勞岐路別酒坐已霑襟

庾嶺三首

不隨野雀棲不挹斜階流
顧茲非我鄉胡然久滯留
侵星陟長阜亭午次崇丘
丸丸青松偃鬱鬱玄雲浮
有淦自東來畢景忽西道
征夫念獨宿徒御方相尤

相尤夫何為獨宿在車下
往矣歲聿除來思月惟夏
大

儀互迴游芳華兩徂謝迴車感長途如歲匪遙夜我馬
既已瘖征夫本靡暇曰旦侯雞鳴嚴程起夙駕

夙駕踰秦嶺連岡勢逶迤一為愁霖唱慨彼東山詩沾
我征衣裳素絲以為緇不愁裳衣濕所嗟徒御飢薄寒
忽中人不異三秋期言旋雖云樂翻使我心悲

謁張曲江祠

峻坂盤神樹陰崖鑿鬼工芳塵羽扇冷春燕玉堂空不
覩關門險誰開造化功經過遺像肅千載嶺雲東

晚過東山寺

飛閣流丹蝕層巒積翠多松間明月在惆悵下山歌

題南昌鐵柱觀

丹甍縹緲麗層城鐵柱縱橫鍊紫清陰洞蛟龍晴有氣
虛堂神鬼畫無聲游人自愛登高賦仙吏仍兼濟物情
雷雨忽愁天外至江湖元在地中行

登滕王閣

峻閣峙洪都凌虛落照孤縈迴窮島嶼波浪接荆吳舊

地君王賞分封禮數殊霓旌千騎入玉佩幾行趨水汎
魚龍宅花濃蛺蝶圖星霜歌舞換俯仰物華徂蹟以三
王重名將百代俱雄文思往事高興亦吾徒闌檻看如
昨登臨信可娛西山開積雨南浦散平蕪作賦秦公子
行吟楚大夫由來憑眺地襟帶有江湖

阻風吳城

客路愁何極清樽幸未空匡廬長在望不厭石尤風

舟次彭澤悼萬孝廉

秦

涕淚千秋在田園萬事非悲風彭澤柳宿草首陽薇但有青蠅弔虛傳白鶴歸秣陵書不遠何處覲音徽

秋浦

秋浦沙寒鷺浴敬亭山暝雲流何處吹來片雨回風正濕鄰舟

烏江謁西楚霸王廟

山前松柏憤王宮遺恨當年尚不窮忽見諸軍盡垓下愁聽父老說江東美人罷舞餘春草駿馬悲鳴自朔風

萬歲來遊還此地千秋霸業有誰同

還家即事四首

回首辭江海驚心念物華漸看鄉樹近彌覺旅程賒
避地虛留井無田學種瓜重為廡下客慙媿說還家
遠客朱顏改高堂白髮新長貧謀半菽幾日且兼珍
遂有耕田計無勞陟岵頻南陔蘭可采眷戀及良辰
卜築仍無地來歸轉自憐癡兒猶昨日病婦已連年
扇有蒲葵攬牀移莞弱眠濁醪供取醉不向酒壚前

至此猶餘悸於馬暫息機不辭新蠟屐重理舊鷄衣鬼
笑劉龍拙車看表紹非生還良已幸長缺幾人歸

有威
介人

履安

也

雨中陳

三島

過偕飲酒樓兼示徐

晟

吳門十日風雨惡決明花開忽復落游人登高愁未已
客子入門慘不樂陳生疎放良可喜雨中過我臨頓里
却話平生同調人吹簫擊筑皆知已皋橋橋西多酒樓
妖姬十五樓上頭百錢一斗飲未足半醉典我青羔裘

坐中臨觴忽不語南州孺子高陽侶同是東西南北人
明朝酒盡歸何處

吳江顧處士

樵

扁舟過訪留所畫山水圖并新

詩見贈集杜句酬之

君不見東吳顧文學前者途中一相見同心不減骨肉
親素知賤子甘貧賤故國平居有所思數篇今見古人
詩飄零已是滄浪客酒後嘗稱老畫師畫師不是無心
學合背高名動寥廓漫勞車馬駐江干數問舟航留製

作春山無伴獨相求
請君一來開我愁
乘興遣畫滄洲
趣舟楫渺然從此去
乃知變化不可窮
意匠慘澹經營中
陰崖却承霜雪幹
山木盡亞洪濤風
尤工遠勢古莫比
雲白山青萬餘里
虛無只少對瀟湘
天下何曾有山水
浴鳬飛鷺晚悠悠
琴瑟几杖柴門幽
嗚呼何時眼前突
兀見此屋獨立縹緲之飛樓

屠維大淵獻

喜羅浮友人過訪

春風蝴蝶飛綠草南園遍知是麻姑五色裙羅浮山下
曾相見開門一笑逢故人遠來問我桃花津若非綠玉
杖定跨黃麒麟不然出入京雒一萬里何為布素無緇
塵相知樂莫樂不用金箱圖五岳況今天地多戰爭赤
城華頂風煙驚山陰道士不得見四明狂客誰相迎由
拳城南春可惜竹石如山水千尺從此扁舟范蠡湖長
歌來往裴休宅

贈顏鼎受

桐鄉顏氏子才大最能詩往作青齊客論交游俠兒星
流赭白馬日射黃金羈不惜歸來困簞瓢樂可知

送王援入蜀省其尊人觀察庭

向晚東城下驪歌不可聽
察親遠行邁送客出郊坰
去馬黃金絡離筵碧玉珩
山花開古驛河柳遍長亭
絕域春零雨浮槎夜挂星
連天秦棧樹如日楚江萍
已見投三峽曾傳役五丁
飛雲橫太白丹嶂落空青
蜀道難如此瞿塘險未經
猿聲流暗壑鳥路入晴冥
好醉臨邛酒

重題劔閣銘還憑梁上月夢想對儀形

渡錢塘

渡口乘潮漾北風輕舟如馬汴江東明朝又是山陰道
身在千巖萬壑中

贈蔡五十一

仲光

十里湘湖水迴流入女牆君家湖水上時有落花香海
月生江寺風琴響石堂更聞多古調識曲漢中郎

梅市飲祁四居士

駿佳

宅同徐十五祁六分韻

舊里仙人市遙峰玉女巖牕中交浦樹檻外落風帆藥
圃穿籬遠沙泉近海鹹紺園留過客黃獨斲長饒榻下
同徐穉林中對阮咸坐來殘暑退涼思入楓杉

題祁六

班孫

東書草屋

愛汝谿堂靜開尊乍卷帷江花平岸發山鳥過庭飛東
海賦垂釣西山懷采薇一為歌白雪高調和應稀

祁六坐上逢沈五

沈五配祁夫
人湘君善詩

東陽年少沈休文五載相思兩地分今日謝家羣從在

青綾障外更逢君

祁

理孫

席上口占

公子華筵醉幾迴
玉簫金管夜重催
他鄉信美不歸去
一飲須傾一百杯

祁六紫芝軒席上留別

長路何年別幽居
此地偏石林芝草
秀蘭澤荷花鮮上
客且安坐主人猶
未眠不知高館裏
絲竹是離筵

顯皇帝大閱圖為吳金吾

國輔

賦

并序

萬厯初太師張文忠公居正秉國勸駕大閱時兵部尚

書吳公

允

實典禁旅俾圖以傳子孫錦衣都督同知

輔國

尚書曾孫也出以觀客圖長三文餘內自宮闕外至陵

寢極于沙漠止焉繇是萊陽宋

琬

作賦南昌王

猷定

作

記而繇尊作詩以述之

神廟垂衣日江陵總百官揆文先奮武慮亂本居安殿

上蕭何履朝中貢禹冠孫通明禮樂方叔莅師干駕馭

英雄在超騰士馬驪車徒看翼翼禁旅尚桓桓畫史真

能事披圖得鉅觀丹青榮顧愷宮室擬胡寬歷歷開城
闕高高疊井幹虛無凌倒影縹緲結重欒太液波還靜
長楊露未乾妝樓原自鑠圓殿不禁寒仙仗移平樂霓
旌擁上蘭忽驚千騎並旋訝六營團作氣陳金鼓前驅
建玉鑾輕雲承翠蓋麗日表朱竿遂列堂堂陣爰升將
將壇小侯班四姓大閱用三單紫燕雙絲絡花驄七寶
鞍呈能羣角觝教射集星弁解飲籌無算鏡歌曲漸闌
行知塵冉冉歸想佩珊珊遠勢工尤極平原繪更難蕭

疎連板屋迢遞出峰巒百里生毫末諸陵望鬱盤薊門
無堠火函谷有泥丸元老謀猶壯諸孫手澤完錦題探
篋筭湘簾展琅玕對此成希覲因之感萬端雨煙飛蜀
錦霜雪皎齊紈賦愧王延壽謠同梁伯鸞儀章常在目
珍重歲時看

飲吳生

理植宅

吳郎愛客解千齡勸飲青絲挈玉餅落日兒童齊拍手
過江三日幾曾醒

食鰕魚

白小休論小奇珍信可珍炎天來積雪入饌總如銀稻
蟹時方早蓴鱸思莫頻不知江海上幾處罷垂綸

越江詞

山圍江郭水平沙過雨輕舟泛若邪一自西施采蓮後
越中生女盡如花

題越江詞後

上虞

錢霍

翩翩公子剡川游五月山陰鏡裏舟自向花前歌妙

曲若邪溪女盡風流

曹娥廟觀渡二首

問渡要津吏沿流信楫師江空鳴社鼓風細颭靈旗遂
入曹娥廟同觀漢代碑浮江千載恨猶有弄潮兒

小小邪溪女潛來事禱祈罷歌河女坐不上越航歸

晉書

夏統傳曹娥沉後國人哀其孝義為歌河女之章

斜日明金闕涼風到錦幃還

持白團扇搖動五銖衣

土城山和錢六

江花江草滿江闌
浣女清歌日暮還
曲罷彩雲猶未散
春風吹上土城山

原作

上虞

錢霍

西施明豔世間希
此地曾經換舞衣
春色不隨流水盡
暮山猶見彩雲飛

雜詩三首

滔滔東流水中有西上魚
素髻揚洪濤騰決勢有餘雲
霧生晦冥川岳助吹噓
白龍未變服胡然愁豫且亮無

圖南志終返北溟居

鷄鷄本大鳥海處揚波濤何意天風來吹之入魯郊
鏘鏘鐘鼓鳴昂首思扶搖青雲鍛其翮烈風焚其巢
先時方笑言後至斯號咷

騏驎服鹽車獼猴騎土牛於心徒欲速為計苦不周
白洋既覆粟太行亦傾輶擇術昧先幾焉能獲所求

寄友人金陵

新從白蓮社舊事紫陽君貽我羣仙珮全勝十賚文風

濤揚子渡松柏蔣陵雲共有山樓志題書報爾聞

同作

嘉興

周贊

青士

昭景元名族宗雷愛道流聞依靈谷住最近孝陵秋

倚閣三松樹

風香閣存
陵樹三株

浮江一葉舟匡山多勝侶何

日虎谿游

又

秀水

徐善

敬可

傳說靈均裔經秋尚未還卜居那有地縹馬定何山
五岳朝羣帝孤舟下百蠻遂令哀郢曲流轉到人間

又

秀水

朱彝千里

三閭文采後之子繼清標少日矜奇服空門賦大招
軍容屯朔騎風物詒南朝庾信傷心地江關入望遙

八月十五夜集半選錢

雨復

齊有懷錢四

汝霖錢四

本姓何

舊識何顯宅嘉興李繩遠斯年溪亭雜樹交秋花低結子

羣寒竹暗抽梢屢下南州榻嘉興李良年武曾彌慚左顧庖山

鉞攜榼酒海鹽錢爾復子湘野菽出杭肴樂飲傾三爵

嘉興李符分虎賓筵賦載呶風多沉北斗繩遠雲密自
西郊肅肅離鴻下尋尊栖栖獨鶴巢空堂鷲蟋蟀良年
涼牖落蟪蛄待月虛高詠爾復停杯試解嘲小山棲隱
處符悵望隔衡茅繩遠

過筏公西谿精舍懷羅浮友人留白下

為愛精廬好海寧朱一是近修還從勝侶探嘉興屠爨
閻伯連山藏磻戶屠爨昭仲百頃漾風潭嘉興李鏡明
遠暇日同看竹嘉興周貧青士終朝罷采藍嘉興終永

謀天自汀州紫曲岸嘉興鄭珏隨始空翠入層嵐嘉興
沈進山子靜聽蓮花漏尋尊幽尋燕子龕李繩遠林泉
訪支遁李良年晨夕過劉惔李符慧業知相似一是玄
言試共叅曠香雲浮貝葉焯松火照金函鏡坐起頻移
榻貧遲留此盍簪曾永謀漫須觀露槿珏且與薦霜柑進
高興雖云洽尋尊離懷總不堪繩遠同心方遠道良年
輟擢復停驂符澤畔吟應數一是淹中臥未甘曠飄零
曾薊北焯棲泊又江南鏡赤羽紛傳檄貧青鞵孰荷擔

永謀石城秋草積
玃步夕陽含進佳
訊憑誰寄
尋尊
端居祇自慙
繩遠西飛有孤鶴
良年天末望蘇耽
符

懷巖煒客嶺南

老去嚴夫子辭家久不回
升沉安可問時命轉堪哀
尚有高堂在曾無驛使來
遂憐望鄉處日上越王臺

同曹侍郎遜和王司理士禎秋柳之作

回首秦川落照殘
西風遠影對巔岬
城頭霜月從今白
笛裏關山祇自寒
亡國尚憐吳苑在
行人只向灞陵看

春來已是傷心樹
猶記青青送玉鞍

同賦

稿李

曹溶

灞陵原上百花殘
隄樹無枝感萬端
攀折竟隨賓御
盡蕭疎轉覺道途寒
月斜樓角藏烏起
霜落河橋駐
馬看
正值使臣歸去日
西風別酒望長安

初秋泊錢清江

錢清江口水平堤
雲木參覃磴不齊
川靜未聞鴻鴈度
雨昏時有鷓鴣啼
逃名梅尉來吳市
避地梁生入會稽

枉自含情臨北渚
秋風嫋嫋草萋萋

飲張司理

陸

南華館題壁

南園載酒勸君歌
涼月紛紛照薜蘿
鏡水連天八百里
張星依舊在明河

梅市對雨遲朱

士稚

不至同呂

師濂

祁

理孫班

孫
分韻得泥字

溪亭蕭瑟水雲低
積雨千山極望迷
落葉漸看沙徑滿
寒鳥偏傍女牆啼
重來賓客仍羈旅
此去鄉關亦鼓鼙

何事懷人坐惆悵且拚今日醉如泥

留別董三

盛

離堂翦燭重燒燭深夜他鄉說故鄉作客蕭條官舍下
逢君歌哭酒壚傍明朝分手仍南北後會相期各渺茫
長路烽煙驚海甸亂山風雨暗河梁

上章困敦

同杜濬

汝言

二處士春日在放鶴洲探梅分

韻

徑轉叢篁曲谿迴石磴斜為園傳故相

唐相裴休別業

勝事復

吾家晚日吹山雨陰雲覆浦沙春風三百樹猶有未開

花

送汪進士

挺游嶺南

獻歲發吳閭緣流抵建康北風吹五兩幾日上潯陽榕
葉山城暗梅花驛路長回思舊游地飛夢到君傍

和曹使君憶姚州酒歌二首

姚州白酒白於泉醉客何論三百錢十月糟牀初滿注

莫教焚却子猷船

曹娥江口晚潮低
兩槳春船入會稽
最憶黃冠歌倒日
夕陽山色鑑湖西

聞東莞查明府舅

培繼

擢戶部書寄

飛來雙燕子
遠自羅浮山
為報神明宰
青春萬里還
風煙辭粵嶠
車馬下秦關
從此相思夢
無煩到百蠻

寄顧處士

有孝

東吳顧文學
念爾亦窮途
留客還雞黍
傾心及釣屠
江

城三歲別書札一行無何日能相訪扁舟范蠡湖

別杜濬

石城烽火後孤客轉浮沉乞食來吳市為園失漢陰
襄陽耆舊傳荆楚歲時心還復扁舟去淒其洛下吟

同魏周二處士集鍾

淵映

宅遲俞

汝言

不至

城隅急雨漲溪沙酒坐銅盤燭影斜有約南樓懷謝監
起看江水落江花

附

簡朱十

秀水

項奎 東井

昨日南樓讌懷人到燭斜風前吟未足江水落江花
寇至二首

百里寒山下桂苻遠近齊探丸分赤白放溜各東西都
尉金爭摸蚩尤霧忽迷今宵聞野哭應有萬行啼

我友遭維繫空留舊竹林徒聞鞭甯越猶未釋陳琳黃
犢誠難賣青氈詎可尋垂堂原有誠端不為千金

里中
王秀

才汚為寇執至營中
家貧無金可贖遭害

壽姚太學集杜

游

五十白頭翁經書滿腹中畏人成小築把釣待秋風黃
卷真如律清樽幸不空看君多道氣恥與萬人同

寄表弟查

客

查容個儻無與儔頻年題詩黃鶴樓一朝攜家忽西下
挂席遠返荆門舟平生與予未相識相逢意氣何相投
往時寒食一百五鬪雞要我東城遊東城春寒吹細雨
留我南軒長夜語坐中陳先緯吳統持十數公一時傾
倒相矜許呼僮將炙襄陽兒喚婢監厨大堤女盤中尚

進武昌魚甕頭更出宜城醕別來幾月不相聞聞道新
詩更軼羣九日登高還落帽三秋對酒定論文由拳城
西白日短寒風淒淒雪纂纂舟楫傳君數往來音書未
得通情款妻子猶從廡下居朋簪尚遣堂中滿年來我
亦善留賓千金散盡空一身不知生產緣何事仍復饑
寒傍路人只今交道非疇昔論心那得同金石空手徒
令壯士慚因人遠道非長策勸君有錢須愛惜楊朱岐
路見不悲阮籍窮途慟何益

友人來自白下期作山陰之游

楚調聞高唱吳航下舊京涼秋八九月招我固陵城射
的仙人去籠鵝道士迎明湖凡幾曲攜手鏡中行

同作

最恨秦淮柳長條復短條西風吹落葉一夜別南朝
范蠡湖邊客相將蕩畫橈言尋大禹穴直渡浙江潮

送屠熾重入閩

閩嶠曾游地仙歌聽未終花源凡幾曲身入幔亭中

梅市逢魏

壁

前年逢君射襄城山樓置酒懽平生淳于一石飲未醉
孟公四坐人皆驚今年逢君梅福市潦倒粗疎已無比
寒暑推移六七年眼前貧賤猶如此悲君失意成老翁
沉復奔走隨西東攬鏡不知頭盡白逢人先說耳初聾
山陰祁生賢地主好奇往往相傾許豈無上客朱

用調

與姜

廷梧

齊向高堂飯雞黍哀絲急管何其多酒酣坐

起舞婆娑魏生魏生奈爾何百年彊半成蹉跎天生汝

才豈牖下何為抱膝徒悲歌

柯山

柯亭山下路修竹暮紛紛衆壑千尋暗雙崖一徑分沙
光明草樹日氣冷江雲更憶中郎笛寥寥不可聞

送錢六

霍

朱大

士曾

同游白下

高詠方從月下聞佳書猶未換鵝羣一朝並馬金陵去
閒殺羊欣白練裙

同王二

猷定

登種山懷古招友人

翠磴盤雲外蒼山出水隈樓從飛翼上峰引臥龍迴相
宅先謀士成功倚霸才扁舟一以去高鳥至今哀授命
誰能爾知幾不易哉古碑猶宿草春殿幾寒灰流覽窮
高下川涂足溯洄車書王會地雲物怪游臺鄉路迷吳
苑賓朋得楚材清言同謝許妙道解宗雷不分征衣薄
寧愁落日催成連能就我急為抱琴來

雪中得內人信

河橋風雪斷歸航遠信沉吟祇自傷不道比來相憶苦

虛煩錦字十三行

古意二首

涼秋八九月游子當遠行
寫心未及竟轅馬顧我鳴我
車駕君馬我馬駕君車徘徊四野中
執手且斯須何用問遺君約指于閨玉
上有龍子蟠下有鴛鴦宿繚以五色
絲青紅與碧綠願君一分手思我贈君
時潛淵與皎日信誓終不移

嚴冬十二月飛來雙白鵲錦字盤中詩
中央周四角君

書我當報我書君當開徘徊一室中庶以喻中懷何用
問遺君却月裁眉前縫以七孔鍼著以同功絲青紅與
碧綠五色絲相連願君一置腹思我寄君情轆轤與車
轂輾轉何時平

寓山訪友人

草綠南園積雨餘溪橋宛轉石門虛山頭白鶴遙相待
知有仙人射的居

同宋使君

琬

游雲門山

頻年客會稽愛茲山水幽咫尺雲門寺經句不出游朝
霞開霽色喜見風雨收使君高興發要我登輕舟輕舟
出遙汀人語荅清泠流連石帆下遂至樵風涇北船吹
以南南船吹以北欲問仙人居迢迢不可得仙人張射
侯乃在雲中弋一鶴西飛來拾矢清谿側鶴飛猶在沙
回流泛若邪可憐誰家女顏色如荷花新妝映碧水一
笑浣溪紗如雲匪我思但弄邪溪月裊裊綠蘿煙照見
清輝發際曉衝薄寒更夜度林樾鬱金蘭陵酒酌以鷗

鷓鴣杯一飲動一石不覺玉山頽扶我上馬行有似乘船
迴便蠟阮孚屐來登任公臺昔賢多奇懷眷此滄洲釣
至今臺下泉清風滿雲嶠蕭蕭翠竹陰隱隱哀猿嘯
嘯溪風生動影搖空明時從翠微半一聽鐘鼓鳴鐘聲
來何遲及此夕陽時山尋子敬宅塔訪辨才基明當凌
絕頂更讀秦皇碑

山陰送葉六

變

還當湖

畫舸乘風一葉輕紅亭相送客相迎最憐小史如初日

不勸離筵到五更

山陰客舍送高舍人還膠州

公子翩翩狐白裘
向予長揖返膠州
西陵松柏間門柳
繫馬春風何處樓

送蔣翰林起歸金壇

自聽驪駒唱
彌令客思牽
相逢纔破月
惜別已殘年
紅

葉山中屐

翰林游雲門賦
紅葉詩三十首

金沙渡口船
遙憑千里夢
飛

度玉堂邊

萬歲通天帖歌贈王舍人

作霖

千金購墨妙摹自萬歲通天年自從靖康亂人間始覩
真蹟傳百年以來藏項氏年時記得曾開視雖無烏衣
四七人尚有金輪十三字若非薛稷鍾紹京安能運腕
如天成銀鈎蠶尾細豪髮懸針垂露紛縱橫表上中書
勅開宴九賓咸列武成殿題扇書裙恍再逢看朱成碧
誰能辨由來神物難久留昨日之日忽我道留題已入
他人室想像空深異代愁王郎生長山陰縣弱年通籍

金閨彥贈我盈盈尺素書君家勝蹟重相見出門瀕洞
風塵多願置懷中字不磨試將射的仙人鶴籠作山陰
道士驚

曝書亭集卷四

欽定四庫全書

曝書亭集卷五

翰林院檢討朱彝尊撰

古今詩

四

重光亦奮若

元日對雪簡宋孝廉

實穎

令節他鄉會春盤上客偏亂雲迷禹穴獨鶴語堯年坐
下山陰雪無愁射的玄明朝江口望定有孝廉船

上元南鎮逢蕭鍊師

夏后藏書日時巡到海陬周王經野地作鎮表揚州秩
祀由來重神功未易酬河山維十道封爵視諸侯碧瓦
雲旗繞香烟石鼎浮笙簫陳里社巫覡醉春秋勝序羣
賢至先生靜者流真形圖五岳遐想結三洲絳縣年須
數黃庭義可求終期御風去長袖挹浮丘

伎席贈王二

松樓竹館映清輝半醉重窺玉女扉我欲傳杯杯不放

落花如雪滿春衣

山陰雨霽同楊大

春華

游郊外飲朱廿二

士稚

墓下

簞醪河邊閒杖藜
道逢酒伴相招攜
醉向南鄰抱被宿
際曉不聽天雞啼
醒來忽驚海日出
披衣却步無東西
殘流小草水泱泱
舍南舍北猶春泥
揚雲不曉事要我
登會稽香爐乍見
紫烟起石簣尚有
陰雲低坐我石橋
上影落橋下溪
笑看屐齒折未得
凌丹梯敝車羸馬
寒

食下感念同游淚盈把新鬼今從故鬼鄰百年誰是長
年者我今持盃一勸君有酒且對劉伶墳從教浣女溪
頭曲并入山陽笛裏聞

侯山讌集

山係晉孔
愉所居

侯山山上放龜臺百尺紅亭鏡裏開試向花源齊列坐
如何蘭渚遠浮杯巡檐浦樹迎人出卷幔洲禽拂席迴
我欲臨風歌一曲起行松月重徘徊

蘭亭行贈朱大士曾

右軍三十三修禊蘭亭中一書蘭亭序天矯宛若天門
龍我今生年與之同秋蛇春蚓百不工竭來山陰道柳
青桃復紅車如雞栖馬如狗空使林泉落吾手朝來蠟
屐思入山雨急風顛重回首吾宗顙也書絕倫頻過論
書仍論文臨池就我一題扇世上俗學徒紛紛持觴勸
君且傾倒晴日今年去年少曲水東流不待人春風吹
徧蘭亭草

梅市訪祁七明府

熊佳

留贈公子

誠孫

因憶亡

友朱廿二七稚

出郭試尋梅福市臨流不減仲長園白花結實垂垂綻
紅藥當階故故翻公子風流能愛客君家兄弟數開樽
重憐日同游少腸斷空山聽曉猿

山陰苦雨酬謝處士

孔淵

坐見天門笑何時后上乾遊人三月罷烟樹六陵攢苦
雨同張協佳書報謝安濠梁有高興春水更宜看

與朱二十九

驛元

約過楊大

春華

三江村居

獨樹原頭盡三江
插口深聞君理舟楫
許我共招尋美
醞千花露生魚一寸
鍼鼉峰如可望試作水仙吟

贈祁七 數

曹娥江上草初齊
謝傳堂前日未西
碧樹紅泉應有待
春來絲竹正堪攜

贈沈 華

沈生好畫魚好詩
昨朝和我春遊詞
臨風一曲歌未已
惱殺城南輕薄兒
城南遊女明珠佩
青翰舟中時並載

生也經營意匠新纖纖貌出當風帶明眸皓腕倚芳叢
修短穠纖思不同飛燕忽教辭漢殿西施不見入吳宮
尤長花鳥工沒骨染草紫沙細如髮蝴蝶麻姑五色裙
蟠桃漢帝千年核新製齊紈更可憐明朝催送下江船
煩君畫作相思樹出入懷中最棄捐

彭山即事

誰家三婦艷新妝靜鎖歲華春日長一出浣沙行石上
飛來無數紫鴛鴦

重經彭山

猶憶清江舊板橋門前曲水細通潮
垂楊不是傷心樹
那得長條更短條

南鎮春遊詞

黃衫白恰染緇塵惆悵花時已暮春
總向越王城下住
扁舟須負五湖人

同作

蕭山
毛奇齡

春船初發白蘋開十里橫塘晚未回
南鎮祠前北風

起夏王陵上雨飛來

酬毛十九

奇齡

兼寄張五

杉

逝矣三春日蕭然百尺巖知君南浦上朝夕望征帆湖
水蓴絲熟櫻桃鳬鳥銜歸期今已近好遣報張杉

偕曹侍郎

洛

施學使

閩章

徐秀才

緘

姜處士

廷

梧
張處士

杉

祁公子

理孫

班孫

段橋玩月分韻

得三字

漠漠孤雲合蒼蒼半嶺含江山攜謝朓風月助劉惔卧

柳維舟數驚鳥繞樹三還同牛渚夜高詠信無慙

同王處士

猷定

施學使

閏章

陸處士

圻

汎舟西

湖遇雨

東風吹落日西下北高峰欲往南屏路中流聽梵鐘迴
船沙岸火驟雨石門松不覺碧雲暮涼烟生幾重

觀海行贈施學士

閏章

吾生空好遊五岳未登一玉女青童笑向人問君婚嫁
何時畢竭來四月西湖邊興盡却返山陰船餘杭春酒

亦不惡醉來只向壚頭眠宛陵施夫子貽我觀海篇吳
飲會吟不足聽高張齊瑟絙朱絃我歌且謠未終曲風
雨秦松振崖谷天雞叫罷搏桑枝羣飛海水搖空綠東
臨傑閣觀蓬萊瀛洲草暖浮烟開丹田玉闕了可覩空
中照耀金銀臺齊三士魯兩生由來此地才華盛我欲
從公問姓名更尋徐市尋仙去親向蓬萊采藥行

曹侍郎席上送別顧工部

大申

還華亭鄒進士

祇謨還晉陵

二子將有
入都之役

古寺登高盡平湖向晚晴琴書方燕息車馬更逢迎置
酒從曹植同遊倦馬卿壺觴無算爵絲竹漸飛聲近地
多佳客中筵忽送行蒼茫浮水國迢遞計王程顧愷名
元重鄒陽賦莫輕曳裾當日異畫壁一時傾皎月衣裳
好微風羽扇清潮迴黃歇浦江入呂蒙城聞有南征士
橫行北府兵

時有兵警

河橋分手處前路若為情

西湖竹枝詞六首

西子湖平鏡面揩雷峰倒影象金釵雲鬟妝就石新婦

香草為裙笄作鞵

山到漣留城下平橋從慶忌塔前橫郎家側近水仙廟
可識水仙王姓名

西曲誰家窈窕孌獨開小店松毛場何年偷得江陵樣
織就女兒黃竹箱

岳王祠外舞臺偏半在湖塘半在田怕值油車蘇小小
勸郎騎馬不如船

養魚莊說養魚肥放鶴亭看放鶴歸妾在鳳凰山下住

生來不見鳳凰飛

湖面萼絲寸寸長為郎情好作羹湯朝雲吹散峰頭雨
日出團團雞子黃

同作

秀水

朱彝鑒

千里

段家橋邊湖日陰石新婦下湖水深自從蘇小西陵
去松柏青青直到今

于忠肅公祠

昔在狼山下軍書犯近垠六師輕朔漠萬騎失雷霆土

木塵長蒲龍蛇歲不寧豆田沙浩浩谷路冥冥濟世
須元老長材總四溟從容持國計指顧悉兵形瑕呂安
羣議劉琨表外迂嗣王仍歷數高廟有神靈既罷金縢
款無煩白馬刑北轅旋翠輦南內啓朱扃命已甘刀鑊
功真溢鼎銘春秋隆代祀俎豆肅維馨一自輶車至難
期埃火停遺墟愁戰伐大樹日飄零碧草空祠長黃鸝
過客聽霜鐘沉曉月風牖繞明星卞壺誰修墓巫陽數
降庭讖還思雨帝碑欲墮江亭遠水澄湖碧流雲暗壑

青千年華表鶴哀怨此重輕

徐吏部

旭齡

招飲西湖迴舟即事

吳姬纖手抱雲和花下迴船燭下歌此夕緣流思並載
愁人無那月明多

施學使

閏章

招集湖舫

朝騎青驄馬搖鞭似飛燕道逢尺一書要我出芳甸是
時孟夏初澹蕩南風遍天公忽大笑向下生雷電吾黨
三五人類古之狂狷脫我尋山屐登艫接高宴作使平

頭奴行厨具豐膳雙絲白玉餅勸飲嘉魴薦向暝更移
舟浮嵐夜頻變平湖靜無波皎如一疋練恍忽對田中
明滅金牛見左持鸚鵡杯右把琉璃研一笑問主人何
似宣城縣試畫敬亭雲貽予白團扇

由淨慈寺登南屏山絕頂晚憩壑菴精舍

南山色蒼翠宛若屏風張下視湖水深十里浮清光是
時溪雨止霽色開秋陽吳娃蕩雨槳送客上方塘靜聽
烟寺鐘忽落翠微傍綠蘿挂絕壁紫葛懸層岡層岡何

盤盤松林蔭巖日公等皆好遊我意雅相匹入洞窺乳
泉登崖采蜂蜜失道蒼耳中蒙茸久方出出谷齊下山
遂叩中林闕山僧顧我笑拍手磐石間簷前桂樹白鏡
裏荷花殷攀荷坐更遲拂石影相並愛此精舍閒留連
日將暝日暝未足愁浮雲蔽崇邱雷聲驚客聽急櫂迴
孤舟

吳山望浙江

一峰高出萬松寒磴道虛疑十八盤近海魚龍吹宿霧

中天日月轉浮瀾風帆岸壓明珠舶仙樹花濃白石壇
舊是錦衣行樂地江山真作霸圖看

湖上贈蘭陵陳生

西泠橋下水清擬惠山流笑問蘭陵客能來釀酒不

寒夜集燈公房聽韓七山人_留彈琴兼送屈五

還羅浮

韓生燕市來夜向招提宿本是悲歌擊筑人援琴為鼓
清商曲安絃操縵夜三更良久徘徊不出聲坐使閒心

遠方聞逸響生商風泠泠七絃遍天馬空山忽不見石
上爭流三峽泉平沙亂落瀟湘鴈聞道清商固最悲不
如清角更淒其一彈試奏思歸引再轉重愁雙燕離此
時晨鐘猶未撞月露霜華滿深巷四座無言歎息頻籌
燈欲滅風升降羅浮道士思幡然忽憶朱明舊洞天種
得梅花凡幾樹泥成丹竈已千年雲山告歸從此始四
百三十二峰裏入海能馴海客鷗攜琴便駕琴高鯉

夜過曹侍郎

溶

倦圃二首

水泛鷗夷宅沙沉槁李亭昏鐘藏古寺修竹亂明星轉
信披衣慣仍看上馬醒山翁餘興在舉手笑重經

初筵月已上半醉榻頻移罷奏飛龍引長謠猛虎詞

時

虎齧城樂府見示

朱絃清廟瑟若木鄧林枝正喜羊何在明當

共和之

時周子質李子兆潢適在郡

玄默攝提格

真如寺塔重建

舊湧仁王塔今開帝釋宮蜂臺重攬勝龍藏古稱雄歷

歷時堪紀高高望未窮地猶丞相宅石是上軍功戰火
臨城日飛塵浩劫中魚羊乘乙酉象馬失西東匠訝胡

寬巧圖看郭恕工

宣和畫譜郭忠恕
有雪山佛剎圖

經營還故蹟髣髴

像新豐點墨遺千界梯雲上半空燈前招怖鴿舄下數
歸鴻不有危標建安知寶境崇火珠將月滿金冶與天
通盤峻宜承露幡吹定繞風留題存片碣高詠後羣公
白髮愁韋誕炎飈靜祝融伽藍如可記應比洛陽同

采蓴

湖水清無底，蓴絲滑可憐。
相要三五客，采采莫迴船。
坐恐葑田合，生憎苧帶牽。
祇應櫻筍配，羶豈容前。

同作

周 質

細蔓垂垂弱，輕舟箇箇添。
參差方未已，采摘定無嫌。
入饌銀絲滑，行厨翠釜黏。
為憐滋味別，更下水晶鹽。

又

朱 彝鑒

四月湖流闊，三潭塔影低。
最嫌絲滑膩，易脫掌東西。
遠水旋教濯，歸舟亦可攜。

家兄貯以瓦盆攜歸長水

當筵啗小陸

羊酪詎堪齊

又

秀水
鍾淵映廣漢

絲蓴先夏摘何苦待秋風入掌
蜚蜨溜綠流藻荇同
魚苗盛水滑雉尾落盤空一笑
辭飭父何勞蒜果筒

湖上逢楊二給事

雍正

零雨三年別晨風萬里遙川涂
思往日舟楫復今朝碧
草湖邊寺青驄渡口橋東山有
絲竹知爾定相邀

同楊二給事飲徐給事

惺

舟中二首

集唐

仙侶同舟晚更移，嬌歌急管雜青絲。
相逢苦覺人情好，百罰深杯亦不辭。

風吹洲渚錦帆開，絲管啁啾空翠來。
此曲祇應天上有，須成一醉習池迴。

夏日西湖同曹學士

爾堪

余山人

懷

汎舟待曹

侍郎

落

不至有感舊游愴然於懷作詩二首

翠壑南屏下，微風細草薰。
山雷焚斷塔，沙柳拂晴雲。
白舫朝朝度，清歌處處聞。
芙蓉如可采，相約望夫君。

回首憐生事驚心念物華同攜今日酒忽對去年花驟
雨翻青蓋圓珠溜白沙坐看雲色暝餘濕到山家

送曾司理

王孫

之官漢中

韓信臺前冷戰雲漢王城北罷懸軍三秦父老還相語
國士無雙屬使君

西陵感舊

鄴下劉文學陳留蔡議郎後身那再託同調轉堪傷白
首憐金谷青山葉北邙思歸應有夢未許訴巫陽

九日

九日烏程縣天寒菊自花遠山初過鴈淺渚舊平沙歎
逝黃壚隔登高白恰斜重憐故鄉侶載酒問誰家

礪山橋觀漲

重陽連夜雨初日汎層波不上濠梁望安知秋水多淹
留攀橘柚想像駕龜鼉北渚漫愁思佳期奈別何

題峴山窪樽亭

醉殺烏程酒天寒不放船從教騎馬去日日峴山眠

吳興客夜

東武亭邊樹栖烏夜半啼江清楓葉下天濶鴈行齊不
寐仍杯酒勞生此杖藜誰家采菱調髣髴度前溪

由碧浪湖汎舟至仁王寺飯句公房

我愛仁王寺來從碧浪湖到門千樹合登閣一峰孤仙
梵迷高下香雲忽有無坐愁風雨至還與飯秋菰

白雀寺

竹徑何年寺松門百丈巖野雲平石磴江日冷楓杉水

落青蓮湧花飛白雀銜五湖者在望生計有蒲帆

對酒酬周質兄弟

去作西陵別來從下若還慙杯酒在試說道場山

送曹侍郎備兵大同二首

司農議論朝端重副相聲名輦下聞豈意尚煩西顧策
翻教暫領朔方軍河邊遠道人千里天外鄉書鴈幾羣
到日闕城春色早李陵臺畔柳紛紛

闕榆蕭瑟二庭空堠火平安九塞通往日連師驚朔漠

只今市馬互西東
黃河天上三城戍
畫角霜前萬里風
知有馮唐論將帥
不令魏尚久雲中

將之永嘉曹侍郎餞予江上
吳客韋二丈為彈
長亭之曲并吹笛
送行歌以贈韋郎
送其出塞

韋郎舊隸羽林籍
曾向營門教吹笛
不聽吳中白雪音
定呼鄴下黃鬚客
平原相見轉相親
置酒誇君坐上賓
下若尊壘朝未罄
東山絲竹夜還陳
閒來坐我花間奏
玉洞飛泉嚮巖溜
古調多傳關馬詞
新聲似出康王授

問我東行到海壖日斜江上慘離筵還將北鴈南飛曲
催送錢塘楚客船船人搥鼓津頭泊紅葉千山富春郭
忽作邊秋出塞聲江楓岸柳紛紛落哀絃促管不堪聽
賓御聞之亦涕零挂席遠移嚴子瀨看山直上謝公亭
聞君欲問雲中戍雪消飲馬長城去廣武營邊折柳時
黃瓜阜上題書處司農舊是出羣才此日征西幕府開
試向尊前歌一曲梅花飛徧李陵臺

舟行酬王明府

世顯

君從漢陽來，飲我宜城酒。酒盡沙頭津，吏迎乘潮直。
泝錢塘口，憶別西陵各。惘然東山零雨已，三年一朝遠。
作瀛壖吏，千里重浮夏。口船君家兄弟文章在，謂孝廉士乾風
昔聲名遍湖海。此去題詩孤嶼亭，白雲青草遙相待。
我欲看山到永嘉，不辭蠟屐向天涯。謝公正有同舟興，
相與揚帆采石華。

七里瀨經嚴子陵釣臺作

宋謝參軍翱有西臺痛哭記

七里嚴陵瀨，平生眺覽初。江山誰痛哭，天地此扶輿。竹

暗翻朱鳥灘清數白魚扁舟如可就吾亦釣臺居

蘭溪道中懷遠

近郭開門一水居別來消息近何如銀絲細鱸蘭江鯉
不見佳人錦字書

雙溪

小店雙溪口官橋百尺長登盤魚赤尾入市棗青筐菽
乳成絲細薑芽配豉良不知前路去何處石為羊

金華道上夢遊天台歌

吾聞天台山高一萬八千丈石梁遠挂藤蘿上飛流直
下天際來散作哀湍衆山響燭龍銜日海風飄猶是天
雞夜半潮積雨自懸華頂月明霞長建赤城標我向金
華問客程蘭谿谿水百尺清金光瑤草不可拾夢中忽
過皇初平手攜綠玉杖引我天台行天台山深斷行路
亂石如羊紛可數忽作哀猿四面啼青林綠篠那相顧
我欲吹簫駕孔鸞璿臺十二碧雲端入林未愁苔徑滑
到面但覺松風寒松門之西轉清曠桂樹蒼蒼石壇上

雲鬟玉洞展雙扉二女明妝儼相向粲然啓玉齒對客
前致詞昨朝東風來吹我芳樹枝山桃花紅亦已落問
君采藥來何遲曲房置酒張高宴芝草胡麻迭相勸不
記仙源路易迷樽前只道長相見覺來霜月滿城樓恍
忽天臺自昔遊仍憐獨客東南去不似雙溪西北流

黃龍寺

黃龍隘口黃龍寺法鼓空林十里聞故老尚談元總管
成功實倚耿將軍蕭條象馬金輪地寂寞山河鐵券文

古往今來意無限仙壇瑤草幾斜曛

蔣廣文薰留飲縉雲學舍為談仙都之勝

軒后丹砂就乘龍上紫清不知滄海畔亦有鼎湖名故
人家住梅溪上渡口扁舟日來往一別柴門已二年看
山忽作仙都長要予松下飯胡麻言自仙都道士家時
有仙童來海市或看玉女載河車一朝風雨青天注馬
跡龍輦不知處蓮花一片天上來從風飄落東陽去東
陽遊女弄潺湲素阿綠流濯足還笑拾飛花看不足當

歌明月出雲間廣文先生居四壁青山無數堂階側采
藥曾迷阮客蹤窪樽舊是陽冰宅君去仙都訪道書金
龍玉簡定何如他時儻入神仙窟攜手同騎白鯉魚

縉雲雜詩十首

吏隱山

隱吏昔山棲留題有真跡將尋好奇人結茅看青壁

窪樽石

不用青荷葉何須白玉杯窪樽山上石醉客有千迴

忘歸臺

連山積翠深白石空林廣落景不逢人長歌自來往

羅鷗灘

灘上羣鷗鳥還應日日來來時看野老百過莫相猜

天際樓

蔣廣文薰
讀書處

高樓上浮雲故人曾此住何處問歸舟惟見雲中樹

西巖

朝聞谷口猿暝宿崖上月夜久天風吹西巖桂花發

惡谿

惡谿無行舟高下惟亂石谿中玳瑁魚可以薦嘉客

仙巖寺

咫尺仙巖寺雲峯望轉親夕陽鐘磬發猶有未歸人

積翠亭

孤亭雲木暝衆壑哀猿嘯空翠濕衣裳夕陽忽來照

桂山

蒼蒼桂之樹樹下幽人語山中正可留惆悵王孫去

繇丹楓驛曉行大雪度青雲嶺桃花隘諸山暮
投麗水舟中三首

曉發丹楓驛微茫出遠郊月斜吹積雪風急燒黃茅斷
嶺羊腸折寒沙虎跡交軍麾猶未靖何處得安巢

隘口屯師日功臣汗馬勞

耿再成破石未宜孫於此

空山無赤幟廢

壘但黃蒿亂插繇花盡千盤細路高繇來設險地未必
盡神臬

峻嶺行還出愁人跡轉孤饑寒催暮日風雪遍窮途土

銚須同燎金刀可剩沾莫辭舟楫小今夜宿江湖

石門懷古寄諸大九鼎

石門山中瀑布水奔流直下青雲裏晴日遙看細雨飄
中林近見微風起謝公當日此山棲啼髮陽阿路不迷
已遣連巖移密竹還營高館對迴谿昔賢勝跡今游眺
佳處猶能領其要我亦沉冥山水人振衣便可稱同調
芳塵瑤席已無存惟見宮雉雙石門不攜江海同車客
何處相期知者論

謁劉文成公祠

草昧經綸日英雄戰鬪年真人淮泗起王氣斗牛躔命
世生良弼卑棲役大賢一官齊簿尉千里正戈鋌記室
依袁紹飛書謝魯連神鷹思飽掣威鳳必高騫漢祖除
秦法周王卜渭畋廟堂才不易束帛禮宜先遂有君臣
契能令帷幄專南征頻克敵北伐旋摧堅王會收三統
軍謀出萬全河山分帶礪冠蓋儼神仙未辟留侯穀長
辭范蠡船麒麟當日畫竹帛後時編一自邱陵改重愁

歲月遷隆中猶故宅縣上少封田舊俗還祠廟清歌入
管絃黃金遺像蝕鐵券幾人傳古瓦甌甍落荒庭檜栢
圓珠絲虛寢冑鳥跡斷碑眠想像陰符策沉吟寶劍篇
前賢餘事業後死尚連遭去去辭粉梓栖栖到海壖空
林多雨雪哀角蒲山川玉帳無遺術蒼生久倒懸憑留
一黃石相待穀城邊

永嘉對月懷家孝廉 一 是四首

娟娟東城月濯濯中園露脩堞乍升輝廣墀已流素感

物成憂端翹思念情故心賞竟莫同獻歌有遐慕

昔我濟江時別子湓湖陰申以款曲言謂可超重深軒
車來何晚離緒故難任不因道路修惠以瑤華音

瑤華尚阻修何以展嘉覲甌越非殊鄉方舟冀來適新
蒲紛紫茸春草齊碧色徒今芳醕陳庶幾煩慮釋

芳醕無長筵煩慮何由捐我思一何篤有若明膏煎煎
山義有託涉川道未愆安得飛鴻翼報子池上篇

永嘉除日述懷

不作牽車別飄然到海隅謀生真鹵莽中歲益艱虞鄉
里輕孫楚衣冠厭魯儒微名翻詆挫暇日少歡愉處賤
無奇策因人遠禍樞同舟邀楚客

王明府世顯

聽曲賞已餒

岸轉羣峯出潮迴衆壑趨江聲漁浦靜樹色釣臺殊祠
宇浮空翠松林儼畫圖羈懷方浩蕩前路已崎嶇草宿
侵寒兔林栖逐夜烏微茫辭建德縹緲望仙都水訝溪
流惡山將棧道紆僕夫行未末風雪灑天衢老鶴侵晨
語窮猿入暮呼轉思臨嶠岵誰分久泥塗柔櫓輕帆下

青田麗水區哀禽爭叫嘯孤嶼忽須臾洵美東甌地由
來謝客娛詩篇留汗漫旅食慰饑飢強禁樽中酒難憑
肘後符朋簪方克萃禮法未應拘生意窺籠鳥流年過
隙駒笑看風土別驚見物華徂紅綻官梅萼青分櫪馬
芻深杯期夜酌細菜出春廚坐久親孤燭更深判百觚
遠書勞日夜歸夢越江湖正憶高堂在知攜兩弟俱屢
空無長物相視必長吁菽水承顏好辛盤令節須艱難
存病婦燈火索鄰通書籍愁捻賣衣裳定有無女長工

男大學投壺倚著憂他日
沉吟愧壯夫
虞翻仍去越
張翰未歸吳
詎有追風驃
恒隨汎渚鳧
達生兼止託
齊物任榮枯
述作安時論
鶯花盡友于
莫將鄉國淚
頻灑阮公途

大牆上蒿行

高秋何多悲
風草木黃落
盡依于土壤
我悲夫轉蓬
從風高下亦
復南北西東
人生在六合
間渺若蜉蝣
之羽促迫日
暮寧保厥躬
何不恣君中
心所欲右挾
矢左抨

弓追脫兔落輕鴻
熊蹯炙鹿茸
開我中堂坐我友
朋援琴倚瑟鼓鼓
考鐘胡為自苦
乃爾十囊五囊之
錢千倉萬箱之粟
細而鹽豉蒜果
量籌握算戚戚思
慮終成老翁上有
蒼蒼者天下有薄
薄之地日往月來
寒往暑來人生安
得久長視不如坐
堅車張高蓋貴且
快意乘我廐馬出
入翱翔黃金為絡
青絲為韁魯之乘
駒周之訾黃燕之
馱馱唐成驕驕雖
自謂神且駿曾不
如臣馬良呼韓娥
進趙倡歌陽阿引
清商暢飛暢舞二
八成行

輕軀宛轉長袖低昂目迎心蕩躡屣鳴璫晉之南威楚
之陽文吳之夷光稱名前代亦自謂美而豔夫何可方
歲月疾如馳為歡能幾時升沉分定窮達天為獲我所
求亦復何思古來達者飲不辭豐刑酒誥徒箴規劉伶
畢卓真吾師但當一月二十九日醉忍使一年三百五
日成齋期

襄陽曲

襄陽近大隄君當慎行旅笑客襄陽兒憐錢大隄女



曝書亭集卷五

欽定四庫全書

曝書亭集卷六

翰林院檢討朱彝尊撰

古今詩

五

昭陽單閣

永嘉元日

官舍紅梅放繁花一樹春誰憐元日會無復故鄉人

元夕寄故鄉諸子

戍鼓動高城青燈暖虛壁為報故園人天涯此元夕

山雪

山雪消猶未江梅凍已殘龍蛇翻遠蟄鳥雀凜相看短
服裝綿少深杯入手乾今宵聞擊柝轉憶北城寒

夢中送祁六出關

酌酒一杯歌一篇沙頭落葉何紛然朔方此去幾時返
南浦送君真可憐遼海月明霜滿野陰山風動草連天
紅顏白髮雙愁汝欲寄音書何處傳

憶河豚二首

正月河豚美嘗時下箸貪未應居海曲翻遣憶江南野
老匙真滑西施乳更甘還持春酒榼爛醉與朋簪

下若槎頭鱸松江巨口鱸嘉魚吾所欲美味爾終輸一
食輕生慣頻年入饌無故鄉弛海禁應得飽春厨

賦得歸鴈寄曹使君雲中

萬里南來鴈歸飛又一羣三江重汎汎二月正紛紛顧
影愁官燭懷書望浦雲關門他夜月應得故人聞

舍弟

彞鑒

遠訪東甌喜而作詩

急難逢令弟訪我自江東頓喜羈愁豁兼聞道里通晴
江空翠裏春草亂山中知汝南來日西陵定遇風

題朱十江東見弟詩後

錢塘

諸九鼎

駿男

有客傳朱十江東見弟詩長城四十字孰敢近偏師
永嘉雜詩二十首

松臺山

蒼蒼山上松颯颯松根雨松子落空山朝來不知處

斜川

九曲斜川水分流到海濱
金釵河上月留照浣紗人

青牛塢

我行白鹿城曉入青牛塢
長嘯不逢人松門已亭午

春草池

謝公去已久空餘池上樓
春風園柳色朝夕使人愁

太玉洞

亭亭五粒松華蓋神君宅
風吹寸草生依然綠袍色

東山

判向花前醉何難典縕袍江南春可樂策馬自蘭皋

南亭

薄雲雨初霽返照南亭夕如逢秋水生我亦西歸客

西射堂

已見官梅落還聞谷鳥啼愁人芳草色綠徧射堂西

北亭

日落空水深潮迴春岸白時有看山人江南望江北

孤嶼

孤嶼題詩處中川激亂流相看風色暮未可纜輕舟

謝客巖

朝看白雲飛暮看白雲宿聞有山阿人曾歌白雲曲

花柳塘

山雪初消盡春塘亂水喧州人還幾日相見樂遊原

吹臺

仙人留吹臺近在南山麓上有半死桐下有孤生竹

吳橋港

聞說吳橋港荷花百里開當年王內史五月權船迴

白水漈

雲峰斷人行活活風泉落知有山桃花青春發紅萼

斤竹澗

谷口啼猿猿巖花泣深露美人今不來風篁自朝暮

瞿谿

鳥驚山月落樹靜谿風緩法鼓響空林已有山僧飯

華嚴山

聞昔華嚴寺頻經逸少過洮河流石斫未若此中多

上戍渡

月露下樞烏天風靜江樹何處夜歸人歷歷沙中語

綠嶂山

谿山百里陰霜葉鳴琴瑟試鼓邱中琴定有幽人出

雨

城晚吹煙霧風迴渡水雲入林初漠漠潤礎旋紛紛響

愛青荷葉涼思白練裯西堂有官燭更遣夜深聞

七夕

遠客清樽夕虛堂玉露秋關山頻北望河漢已西流葉落他鄉樹砧催故國樓今宵看織女未必詣牽牛

東甌王廟

九牧維揚外三江霸越餘

王勾踐之後同長沙王吳芮率百越師從漢祖入關滅楚

入關從漢約遵海裂秦墟豪俊宜如此艱難氣不除策功居項藉分壤接無諸迹異尊黃屋忠能奉簡書長沙

堪伯仲百濮定何如萬古開王會孤城指帝車

永嘉城
象北斗

號斗

靈旂存髣髴過客盡欵欵殿瓦年頻圻霜林日漸

疎躩踞山鬼立苔蘚石堂虛側想風雲會乘時草昧初
遠塗今日暮下拜獨躊躇

華陽精舍贈源上人

支公櫪上馬謝客郡東山繫馬林亭外看山日暮還
瑤華猶未折桂樹尚堪攀試醉陶潛酒狂歌白石間

郡東山對月有懷周四

吉亥

陳大

忱

吳二

周瑾

白露侵亭慢涼煙滿桂叢如何秋色裏不與故人同蕭
颯聞風葉飛揚見羽蟲南樓滅明燭佇望海雲東

秋日對酒江心寺同高石埭

駿升

作二首

謝監尋山日江童擊汰迎寒潮天外落秋草渡頭生歷
覽窮孤嶼逍遙倚化城行厨深樹裏乳酒正須傾

驟雨連山暗回風病葉飛入林初緩帶改席忽沾衣客
醉從高枕川長得斷磯扁舟憐范蠡鰕菜久忘歸

雨

斷續江天雨涼風滿戶庭轉添秋草綠更洗暮山青積
霧猶沉樹明河早見星南亭有歸客朝夕待揚舲

夜渡永嘉江入黃巖

絕岸蒼茫水窮山斷續風雨歸沉黑蛟川暝失丹楓華
髮垂垂短悲歌處處同最憐中澤裏深夜有哀鴻

送吳二先輩還漢陽

漢南歸思遶晴川湓浦西風送客船莫上武昌門外望
斷腸楊柳似當年

九月十四日夜月

坐惜如珪月懷人歷九秋關山仍遠道西北有高楼苦
憶前溪別應添少婦愁清輝憐玉臂獨自下簾鉤

返照

反照開寒峽江城入翠微明霞飛不落獨鳥去還歸是
處聞吹角高樓尚曝衣山家多畏虎應各掩柴扉

孤嶼亭對月

皎月空江滿寒雲萬里收纖毫瞻顧免恍忽動潛蚪望

遠高樓笛行歌半夜舟南征有鴻鴈相傍宿沙頭

雨渡永嘉江夜入柵溪

落日下崦嵫飛雨自崇墉駕言出北郭汎舟橫東江近
岫既凌緬遙岑亦濛籠葱青水竹交乃有樵逕通潛蚪
寒載蟄海鷗夕來雙顧望雲葉開張星昏已中荒岡響
哀狄枉渚遵輕鴻故鄉日以遠川路靡克終寄言薜蘿
客歲宴期來同

題廊下村主人壁

江城獨客一千里海月愁人十上絃夢裏還家無長物
天涯歸思逼殘年飢寒僮僕今何有雨雪關山劇可憐
珍重主人投轄飲幾回把酒意茫然

華壇望鴈宕山歌贈方十三

朱生

朱十八

振嘉

我昔逢羽人迢迢歷滄海貽我神山鴈宕圖玉笈金箱
至今在夢想忘歸亭上游琪花瑤草幾春秋崩流一萬
丈濯足大龍湫邇來作客荒山道欲往層崖事幽討方
君遇我顏色親朱子更覺人情好攬環結珮山澤間樂

酒今夕須歡顏登華壇之絕頂眺鴈宕之迴巒雲容容
兮欲雨水嘈嘈兮下山遙岑出沒不可以悉數但見哀
禽雜獸日暝而俱還君不見宗少文當年意興真軼羣
名山卧遊不得見眼前圖畫空紛紛君不見謝康樂跡
近名山遠城郭咫尺丹梯竟未登江南江北徒邱壑我
今得偕二子從遙看一百二高峰彈琴坐待天邊月攜
手同行石上松荆榛極天路參錯惆悵平生遠遊諾安
得仙人相贈九節筇招爾雲中兩黃鶴

病橘

病橘何年植
巡簷許數過
他鄉淹歲月
此樹漸婆娑
滿院飛蟲繞
空庭落日多
向來懷袖意
華實竟蹉跎

西陵後感舊

潘安曾對酒
吳質數論文
舊史悲難續
斯人意不羣
一為江海別
遽作死生分
淒斷山陽笛
那堪歲歲聞

文丞相祠

尚憶文丞相當年此誓師
計成猶轉戰事去祇題詩
竹

柏空祠屋牲牢尚歲時鷗夸他日恨異代有同悲

謂永嘉諸

生鄒維則也

歸次皋亭山作

去年雨雪桃花嶺此日烟波槁李船
相值皋亭山上月離家一十二迴圓
滄江游子愁心劇白髮高堂望眼穿
行李自憐垂索返田園生計轉茫然

閏逢執徐

別李

繩遠

鴻鴈歲北向鷓鴣日南征棄置父母邦
各事萬里行我游踰上谷君去適昆明
迢迢異鄉縣邈若參辰星登艫即長道
祖席依修垆俯視溝水流仰見浮雲平
居人有餘戚況乃衢路情昔賢重離別
努力期修名忠信苟不渝川陸猶戶庭
日過月斯邁暑往寒再更但令長相思
何慮不合并

送孫處士

默還黃山

蕪城客散亂烏啼別業黃山路不迷
後夜相思秋色遠

月明三十二峰西

淮陰城下作

岸柳行將遍郊扉日漸昏淮陰十萬戶誰解飯王孫

七夕雨

七夕他鄉雨孤舟下相城戍樓連樹黑漁火隔河明且展輕衾卧難沾濁酒傾故園兒女在相憶定含情

黃河夜月

落月黃河曲先秋白露寒牽牛何皎皎桂樹此團團直

北程難計天南淚不乾居人掩閨夕知己夢長安

謁先賢仲子祠

光岳鍾青帝明禋配素王世家猶不泯俎豆儼成行力
養嗟何及長貧更可傷如聞琴瑟在千載感升堂

分水廟酬高大

佑鉅

落月西風動戍樓津亭官柳繫輕舟行人莫唱思歸調
汶水南來已北流

守牖清源驛凡五日不得度

清源驛路接幽燕
日日沙頭但繫船
五兩南風空自好
無由吹送衛河邊

臨清州大寧寺

西北浮雲過雨晴
香臺落日散高城
遠烟歸鳥忽雙下
法鼓空林時一鳴
江海幾人懸夢寐
詩書無地問柴荆
勞生擾擾成何事
目極關山萬里情

曉發東光縣

際曉投前路
衝寒祇緼袍
關河仍鼓角
舟楫已風濤
落

月金樞動疎烟上銚高謀生宜有策筋力爾徒勞

青縣同高大佑紀雨泊

黃河秋潦急羣盜正紛紛去遠驚秋半愁多語夜分空

城寒更雨哀角斷還聞正值南飛鴈嗷嗷度海雲

八月十五夜集天津曹武備

斌

官舍分韻得牀

字

北里商歌倚笛牀層城秋色轉蒼涼關河西望猶千里

時余將適雲中

烏鵲南飛更幾行冷露自零叢桂樹深杯無那

鬱金香習池不改山翁興倒載還同舊葛疆

高博士

恒懋

席上留贈公子

緝庵

二首

列席先投轄升堂喜盍簪飄零忘薊北風物盡江南
滄酒瓷甕滿張梨白露甘留連如意舞更與阿戎談

西陸清秋候東山舊宅開壺觴兼日夕文詠許追陪
且為看花起還愁上馬回春風倚歸櫂賭墅定重來

出居庸關

居庸關上子規啼飲馬流泉落日低雨雪自飛千嶂外

榆林祗隔數峰西

土木堡

平蕪一簣狼山下九月驅車白霧昏到眼關河成故迹
傷心土木但空屯元戎苦戰翻迴蹕諸將論功首奪門
早遣金縢和社稷祠官誰奉裕陵園

宣府鎮

高城西北控燕都吹角清秋落日孤尚憶武皇巡玉塞
親從鎮國剖金符宮槐御柳今蕭瑟虎圈鷹坊舊有無

邊事百年虛想像誰誇天險塞飛狐

上谷道中

急雪千山下渾河萬里流搖鞭逢漢使走馬入雲州

苦寒行

九州皆可歷何為雲中居聽我歌苦寒泣下沾衣裾

解一

寒風利如刀雪花大如席重裘如束水安問締與綌

解二

白日無光晶驚沙但茫茫舍我四方事土室獨摧藏

解三

白登自言高乃是太古雪漚洳自言深腹堅不可裂

解四

斧冰持作糜鋪糜糜已冰展轉長宵中晨夙不得興

五解

攬衣未及帶手龜血出漉嚴霜割我面哽咽不得哭

六解

男兒可憐蟲出門思故鄉寧飲吳市酒不樂邯鄲倡

七解

傷歌行

北風其涼雨雪如擣栖栖素冠行彼周道

一解 蟬則有筐

蟬則有綏父喪不葬誰憐我為

二解

瞻彼桓山有革其羽

載鳴載揚忽失其侶

三解

力行雖疾不如奮飛遠望雖高

不如早歸

四解

凡百君子庶幾心惻翳桑之饑可以報德

解五

十月十四日夜同曹使君雲州對月

發軌自徂暑息軼及玄冥迨迨沙際月皎皎雲中明
臯禽警朔吹別葉辭苦莖青霜降北陸參井緬縱橫
主人託嘉藻休澣寡所營悟彼行役艱曲宴奏中誠
清樽湛瑤席兔首亦以烹但言音塵闕豈意良覲并
謙謙君子柄習坎美不盈澄輝矢相照慰我殷憂情

十五日夜月

重陰積邊亭風候異揚粵駢筵集親懿復此亭上月析
析靜哀林斐斐滿層闕清砧無緩響素雲屢興沒客情
易為懷庶用慰寂蔑哀鴻逝不居流芳久云歇天道互
虧盈物理信昭昧詩人戒太康職思永無忽霜露日夜
零故鄉渺難越悽愴遊子心獨坐待明發

十六日夜席上贈陳孝廉

晷運方代序感此成鬱陶良友繫白駒芳酒永今宵團
團東城月萬象仍光昭誰言容輝減彌覺神理超哀笛

奮層樓餘響薄風霄悲哉遠征士氣轡不得驕冲魄會
有宜盛滿誰能要伯陽之流沙箕子去商郊苟懷艱貞
節道德豈不劬申章託微諷撫景答長謠

十七夜月

磊磊列宿明晚晚塞日晚盍簪數晨夕吾道豈云遠飛
光上層軒薄雲冒崇巘迢迢界斜漢惻惻引朔管圓靈
乍警闕素魄已辭滿清輝寧有渝潛德期日損幽人貞
素履君子利往蹇擇術雖殊塗心賞得所款感目既多

顏懷鄉匪異撰申旦陳苦言庶令勞者纂

甲辰冬月朱十訪我塞上賦對月詩奉答三首

同里曹溶潔躬

昔我登羅浮靈雲翼飛軒炎光扇四序
曄曄神芝顏有美儼相從盛作游覽言
芳蘭麗重墀列植皆翩翩洗爵命清醕
鱸鯉出丹淵選日駕輕楫跌蕩珠江前
矢口吐嘉藻衆賓稱我賢聿來鴈門棲
轉瞬八九年寒燠既殊軌苦志何由宣
燦燦金張徒凌忽若浮烟

賴有同心士風雨仍勿愆樂莫故交樂遂賦明月篇
月出照城闥兵甲何洋洋連山萬餘里縣亘不可詳
列營慘清角羽燾隨鳳翔束芻徵近郊飛駁蔚千行
獵火耀繁星毳服禦嚴霜章甫謬司憲飭躬戒無荒
蓬管閉重閨民俗偕吉康方厓索處憂之子凌大江
弗效兒女仁忼慨溢中腸曠觀幽與并回睇思故鄉
旦夕事游燕孤抱成匹雙何意塵土區逍遙奉圭璋
圭璋慎中闕黽勉循昔經暫當展清輝釋憤於邊庭

深雪蔽層阪修柏含青英匡世羨高度緇塵詎能撓
短褐濟三冬園葵待晨烹曲房剪茅茨靜見游鴻征
文籍繞四座持酒忻共傾開懷玩流景哀樂全其貞
悠悠道路間乃得親友生恒嶽有盤石足以喻精誠
環顧王化周冀方息交兵卷組及良時無為耽令名

雪中至日

去歲山川縉雲嶺今年雨雪白登臺可憐日至長為客
何意天涯數舉杯城晚角聲通鴈塞關寒馬上龍堆

故園望斷江村裏愁說梅花細細開

雲中客舍曹武備自津門以筐蟹銀魚見寄賦

謝二首

千里三沽使傾筐異味傳霜螯初入手臘月更須憐重
馬愁關吏香杭憶野田江鄉好風物罷酒數歸年

水族殊鄉至明燈夜不孤雪花寒意減玉盃近看無反
厭流匙滑宜將剩酒沽遙憐垂釣客白首向江湖

贈周參政

周君北地推風雅幾載栖遲白門下四壁蕭然竟罷官
知君亦是悠悠者匹馬西來訪故人相逢師友更情親
自言溽暑辭堂邑不覺辛盤換早春春晴風日官齋迴
翰墨于今數公等畫品真同顧愷工隸書遠見鍾繇並
貽我梅邊索句圖江南春思到平蕪蒼苔濁酒尋常得
冷蕊疎枝何處無紆千山高凍飛雀健步移來總蕭索
不見黃須細細開惟愁白雪紛紛落蘇武城邊送別遲
桑乾河上已流澌遙將南浦離人曲迸入西征橫笛詞

憐君此去壺關道
盍簪到處逢迎好
澤潞三時芳樹多
江風五月歸帆早
滄洲萬里憶田廬
流水柴門今尚虛
卜鄰儻就移家約
來共梅花溪上居

絕塞

絕塞衝寒起妖星
逼歲除幾時離畢
昴三見改蟾蜍我
友官中禁憂時獨
上書

謂楊給事雍正時上
疏言彗星見宜修省

由來天道

遠垂象果何如

旃蒙大荒落

長歌行

糾糾葛屨行彼中逵豈無轅馬登高則危

解一姬姜誨淫

吉士悼之赫赫王侯竊鈎笑之

解二

羔羊之革可以禦冬

狐貉雖溫君子固窮

解三

誰謂松柏微霜萎而誰謂風雨

雞鳴已而

解四

芻蕘者謀先民所度志士立言豈必好爵

解五陟彼北山俯視崇丘千秋萬歲孰知我憂

短歌行

飲酒當醉拔劍當歌人生相知樂豈在多

解一相彼中林

枝葉猗儺嚴霜一至焜黃奈何

解二

飄飄寒風不知所屆

豈曰無衣將子于邁

解三

鳴鹿在囿載食其蒿男兒墮地

惜無錢刀

解四

明星在天雨雪在野我思故人泣數行下

解五

今夕不飲來日大難今者不樂來朝永歎

解六

和朱十短歌行

嘉興

鄭

珮

隨始

北風烈烈雨雪載塗我思禦冬旨蓄則無

解一

濯濯江湖

曷取其魚繇繇遠道曷策其車

解二

僕夫夙駕攬子之祛

子無先路俟我城隅

解三

尊有甘酒不在百觚俎有嘉

有不在兩翰

解四

子有苑囿當推我居我有錢刀當念

子需

解五

蟪蛄迫暮傳語蟪蛄今者不樂斯馬已夫

解六

鴈門關

南登鴈門道騁望勾注巔山岡鬱參錯石棧紛鈎連度
嶺風漸微入關寒未捐層冰如玉龍萬丈來蜿蜒飛光
一相射我馬忽不前抗迹懷古人千載誠多賢鄧都守
長城烽火靜居延劉琨發廣莫吟嘯扶風篇偉哉廣與
收勇略天下傳時來英雄奮事去陵谷遷數子不可期

勞歌為誰宣嗷嗷中澤鴻聆我慷慨言

觀獵

白狼堆近雪嵯峨風卷黃雲入塞多
盡道打圍春更好
夕陽飛騎兔毛河

晚次崞縣

百戰樓煩地三春尚朔風
雪飛寒食後城閉夕陽中
行役身將老艱難歲不同
流移嗟鴈戶生計各西東

滹沱河

滹沱河上流漸急騎馬春冰滑可憐百尺浮橋空斷板
孤城哀角動荒烟愁顏送老饑寒日絕塞因人雨雪邊
轉憶江鄉多樂事花濃齊放五湖船

將次山陰墮馬傷足張明府

施大

枉顧逆旅餉

酒賦謝二首

可怪乘船客今朝墮馬來半人宣武笑長路步兵哀地
主逢傾蓋天涯獨愛才淹留憐逆旅相餉竹根杯

果見軒車至倉皇啓夕扉亦知寬禮數強起著裳衣涕

淚餘生在泥塗萬事非遐方堅卧轍猶得藉光輝

留贈王沙縣

泰壩

四首

文端公
家屏孫

黃閣先朝重清門絕塞存東山遺別墅丙舍有諸孫吳

楚遊能徧詩書道自尊憑將飛蓋夕聯騎問詞源

墮馬愁方劇欣逢出戶迎人扶妨折足家遠竟全生翦

韭當三月浮杯及二更孰知舟楫趣款款話南征

先臣典禮日相國去官初各建留侯策同傳賈傳書

文端

公以爭建儲去國至先文恪掌
大宗伯事章凡三十上得允

聽歌增忼愾話舊各款

敝俯仰悲身世相看計盡疎

范甌菜蕪返王鳧葉縣歸飢寒仍不免子姓復何依挂
壁蠲租詔張羅款客扉由來被褐士萬慮與時違

將之晉陽留別包十二 銘

客程冰雪阻蕭闕蕙草芳時各未還此去尚同千里月
相思知隔幾重山

七馬坊

積潦黃蒿外連岡黑霧中轉愁人馬滑真覺道途窮陶

穴遺深井沙陀沒故宮離程渺天末九月斷征鴻

再度鴈門關

時聞舍弟
彝鑒病卒

鴈門關北鴈初飛萬里征人淚濕衣回首秋風行已斷
天南消息到應稀

夢寐

夢寐看見女沉吟泣數行他時嘗獨立永日見相將去
動憐渠小歸應共我長雲山千萬里誰道不思鄉

捕虎詞

黃桑彎弧棘作弩村民少長齊捕虎南山有鹿北有獐
何為馱我檻下羊青天杲杲白日出橫行大道終罹殃
君不見靈邱捕虎虎盡死太原城中狼入市

晉祠唐太宗碑亭題壁

集杜

步屨深林晚春池賞不稀文章千古事社稷一戎衣野
日荒荒白悲風稍稍飛無由覩雄畧寥落壯心違

宋烈女行

紅羅持作帕素練持作巾何必合衾幃始為同心人宋

氏有女典生長蔚州之野西崖之山年紀十五餘許配
千字村村民蘭州廝大義結夫婦忽登泰山錄人壽不
得久女方曬穀聞之聲悲哀長跪告父母兒當從黃泉
下信誓旦旦不可乖父母向女言尊章爾未事慎勿捐
形軀相保親父子各各還室中涕淚終不止月正三十
日其日二十三白日從東來奄忽墮西南闔門夜無人
女向空庭坐攬我素練巾接彼紅羅帕徘徊寢室旁自
挂中門下父母啓視哽咽不得言觀者四方至數息日

暮還童童崑嶺側乃有松柏林誰言寸草莠乃有松柏
心

明妃曲

上林消息斷歸鴻記抱琵琶出漢宮紅顏近來憔悴盡
春風更遜畫圖中

柔兆敦牂

臺駘廟

鳳鳥書官後鴻荒障澤年神功開白壤帝系出金天分

野捫參次山川奠禹先按圖移岸谷紀遠昧星躔亂水
汾洮別諸姬沈如聯唐風誰始祀魯史至今傳簫鼓橫
流散風沙急溜穿勢曾吞北漢潤亦被西邊壁馬黃河
並雲旗玉井旋軒裳存想像憑弔一茫然

送趙三

湛

還永年

離堂卜夜且成歡酒盡休歌行路難四十逢時猶未晚
看君騎馬入長安

太原客舍同方三孝廉

育盛

話舊二首

欽定四庫全書

卷六

遠戍崔亭伯還家管幼安千金裘馬盡十載道塗寒華
髮同雙鬢悲歌感萬端平生蕭瑟意長缺為誰彈

舊業東山下曾經賭墅過飄搖秋雨後零落戰場多避
地從人問誅茅奈老何烏衣雙燕子留恨滿關河

龔

百明

自梗陽以詩見寄漫答二首

傳聞花縣客不異幔亭居

閩中張君汝瑚今
清源龔子館焉

旅興吟紅

藥宿筵鱸白魚仲宣懷土日司馬倦遊初咫尺橫汾隔

難尋下澤車

道重論交地書題把臂前相憐煩縞紵永好有詩篇多
難休儒服他鄉澀酒錢但期羨隱見日話歸田

七夕立秋王方伯

顯祚

席上和毛

會建

暑退林初暝尊開露漸滋客中憐夜集天上果秋期片
葉辭風下長河卷幔垂莫教涼月盡同和謝莊詩

客夜

陽曲城頭烏夜啼明燈深巷綠窗低從教趙女工瑤瑟
不遣愁人醉似泥

聞黃鶴樓成賦寄楚中一二知己

平生未鼓湘江柁
萬里投詩黃鶴樓
壯觀百年今在眼
異時獨上迴含愁
碧牕下湧樊山月
紅葉斜連鄂渚秋
為報故人多釀酒
飛帆真作漢南遊

寄酬譚七舍人

占璉

陸二舍人弟

蒙

客久憐書札
鄉遙感歲時
空淹雞鹿塞
遠隔鳳凰池
九月茱萸會
頻年雨雪詩
朝回逢陸弟
為報日相思

題倦圃圖二十首

叢筠徑

柴門面湖水深徑聞人語
月出翠烟開相送乘舟去

積翠池

流水石橋東修篁蔽空曲
獨吟橋上行縹緲衣帶綠

浮嵐

空鷺拳沙石虛牕啓夕烟
東西望南北蓮葉總田田

范湖草堂

松石閉門中芳菲蕙草叢
春船迴夜月鰕菜幾時同

靜春莽

晴戶冒晴絲
風花爛紅藥
緬懷風中琴
薰此花下酌

圓谷

山牆高下築
中見林扉開
相邀入空谷
偶坐心悠哉

芳樹亭

獨石欹長卧
空亭夜不扃
春風平仲色
相見幾回青

谿山真意軒

遠樹聞疎鐘
夕陽上喬木
相對忽忘言
賞心在幽獨

容與橋

清淺水石間文魚散花嶼催客引流觴山橋更延佇

漱研泉

主人南粵歸獨載端溪石晝日三摩娑此意人不識

潛山

積雪開半林洩雲有膚寸會此靜者心潛藏本無悶

錦淙洞

霜林吹石溜清響徧亭皋夜半愁風雨不知山月高

采山樓

高樓坐銷憂
樵李亭西路
夕照望千家
春浮倚雙樹

捐谿

我本狂歌子
却愛捐谿水
滔滔天下人
誰能洗其耳

金陀別館

舊識談經地
巖扉靜不開
秋深叢桂發
金粟禮如來

聽雨齋

風吹石蘭花
柔萼雨中長
清夢入空山
亂落紅泉響

橘田

瀟灑衡門下陽坡縱所如青霜猶未降先報右軍書

留真館


平生金石心一室千秋慮我亦問奇來徘徊不能去

澄懷閣

欲覽城南勝宜登池上樓煙波長在望不放五湖舟

春水宅

遠水浮橋直方塘入戶低東風楊柳樹吹綠草堂西



曝書亭集卷六